

## 2 Oritxi Mahãdu-ò 2 Oritxi Hãwã Dohodỹỹna Mahãdu-ò

<sup>1</sup> Jiarỹ, Paulo, Deuxu deòduõ watzireri Deuxu-deewireki. Tahe katyyriti rewahinyrenyire Oritxi hãwã dohodỹỹna mahãdu-ò. Iny seriòreneny Tx-imòtxi wawana ihỹre. Tule rewahinyrenyire ibutu ityhydỹỹdu mahãdu roholakemy Akaia bedeki.

<sup>2</sup> Ruxetòena, ywina-wana adeereny kanakemy idi watzireri Deuxu inytybyreny-ribi Jesuisi Kristu Inynyrỹ-ribi.

<sup>3-4</sup> Deuxu heka Jesuisi Kristu tyby rare. Iny wiòhedỹỹdu ihỹre. Ruxetòena sòwemy inydeereny riwahinymyhỹre. Ibutumy aõmydỹỹna-di riwiòhenanymyhỹre. Tai tahe iny witzira rikiwiòhenanyrenykre Deuxu wiòhedỹỹna-di.

<sup>5</sup> Iwese Kristu aõhòkỹmy dỹỹnana kaiboho teerytenyete wese, Kristu wiòhedỹỹna bitamy bierybenyke.

<sup>6</sup> Jiarỹboho aõhòkỹmy arotỹỹnyrenykreu, awiòhenadỹỹrenykremy tuukre. Tai tahe tarasana iribi bitake. Deuxu-ribi wiòhedỹỹna arimyrenykeki, kia biu-ò hena iribi bimyke arawiòhenanyrenykremy. Tai tahe kaiboho arururenydikre aõhòkỹmy botỹỹnybenykreu.

<sup>7</sup> Tahe wararòsòna sòwemy ihỹre akireny. Tiubo aõhòkỹmy dỹỹnanamy botỹỹnybenykreu tule wiòhedỹỹna bitabenyke iwese aritarenykre wese.

<sup>8</sup> Waityhydỹỹdu seriòre, Asia bedeki jiarỹboho sòwemy aõhòkỹmy ratỹỹnymy roiremahã.

Wadeereny heka isiratyhyre ibede-ki. Tai heka raberumy roiremahã arururenyke lau.

<sup>9</sup> Rahõtinyrenyre tai wakananareny sana. Kiamy heka wadeereny ditÿnynyde bedeernamy: ixi-di inyõ nohõtïõmy, Deuxudihyyle wahe. Tii dori rubu-ribi ixixadu rare.

<sup>10</sup> Inatyhymy tii riwatarenyre kia brebuna-ribi. Ibutu aõna aõna-ribi riwatarenykre ixityre.

<sup>11</sup> Kaiboho dori wadeereny Deuxu-ò textitøenytenyteri. Tahe ibutumy ixitøena-ò Deuxu kodoholakre tai riwiòhenanykre. Tahe ibutumyiny Deuxu riteàlananykre.

<sup>12</sup> Ibutumy jiarÿboho heka kia Deuxudeewimy rewinymyhÿrenyre. Tai heka wadeysarenyre jiarÿboho. Awanareny heka tule rarybe-mahãrenyre: òbitinamy, Deuxu rurunamy. Iny raykywydyna-di aõkõ wahe, Deuxu raykywydyna-di.

<sup>13-14</sup> Idi mariakele, biritinykele, bierykele, kia reritinyrenyre adeereny. Wiji urihimyòle teerymy toite. Jesuisi txu tahe ibutumy bierybenyke. Jiarÿboho areysarenykre bierybenykeki wahe. Tule kaiboho beysabenykre.

<sup>15-16</sup> Juhuu rahõtinyre kiawesemy: arakemy ixi-di rahõtinyre. Juhuu heka Macedonia hãwã bede-ò arakemy ixi-di rahõtinyre. Iule tahe aroramy arakemy heka ixi-di watxiwãhã. Òkeseu tasÿ tule, aroramy adehemynykre. Tai wiòhena inatximy bitake. Jiarÿ ayrenymy areakreu, Judeia bede-ò arakemy kaiboho biwawiòhenanybenykemy.

<sup>17-18</sup> Reòsamy watxirerimy aõbohe wadi

tahõtinytenyteri? Ixiòrarukile aõbohe tuuremy adee araỹraxikre? Tuu aõbo iximy rarybere kohe, myỹ, iule. Aõkõre, myy rarybere, iule wahe. Inatyhymy aõbohe rarybereri. Aõkõre rarybeõre. Jesuisi Kristu heka warybe rierye. Kohe, myy, iule.

<sup>19</sup> Tai heka raryberenyre: –Inatyhy rare. Myỹ wahe, Deuxudeewinamy. Sila Tximòtxi-wana kia Deuxu rybe-di adeereny ritỹnynyre, Jesuisi Kristu iriòremy, jiarỹ tule adeereny kia retỹnynyre.

<sup>20</sup> Inyboho ratximyhỹre Jesuisi Kristu-ò. Kristu heka Deuxu widỹỹdu ratxireri. Inyummyreny ratximyhỹre. Deuxu heka tuu iny rierynanymyhỹreny, tii inatyhy.

<sup>21-22</sup> Tii heka iny ritamyhỹreny; rihitximyhỹreny; tahõrõ mahådumy riwinyre. Inydeereny riwahinyre Deuxu Tyytybytyhy inyworeny-ò risỹnyre. Tai heka inyboho rõhõtinyreny inydeereny ibutumy riwahinykremy.

<sup>23</sup> Deuxu heka warayky rierye. Tai heka rarybemahãre, inatyhy raõre Oritxi hãwã-ò. Tai heka adiride ixinamy.

<sup>24</sup> Araryberenyõtyhy jiarỹboho aõbo bityhynybenykemy, marybebenykemy. Kaiboho dorihe inatyhyna tetyhynytenyte. Urile tahe arawiòhenanyrenykre deysana-di Deuxu Tyytybytyhy dee deysana-di.

## 2

<sup>1</sup> Tai wawo rerahòrera. Arakemy aõkõ abedeòtiidỹỹrenymy ixityre.

<sup>2</sup> Arabedeòtiidỹỹnyrenykeki tahe mobo riwateysanykre. Kaibohole toite.

<sup>3</sup> Tai adeereny reritinyre. Anaõtyhy heka abedeòtiidỹrenymy. Kaiboho dori deysana-di biwasỹnybenyke. Iu wadeysamy watxireriu, kaiboho tule beysabenykre. Kia heka reerywiwire jiarỹ.

<sup>4</sup> Adeereny reritinyre bedewona-di ranywãhãu; warube rytynymahã. Bedeòtiidỹna-di arasỹnyrenykemy aõkõ kỹny. Tahe timybo aluurenymy kaiboho bierybenykemy adeereny reritinyre.

<sup>5</sup> Bedewonamy relyykeki, tiu inyõ wii ribedewonyreu, riwabedewonyõtyhy. Aõtxi arabedewonyreny. Waryberiti isirare aõkõ ihỹre.

<sup>6</sup> Aõhõkỹmy dỹñnanamy yla aõkõ rotỹnyre. Tai ixinamy rarekre wiji.

<sup>7</sup> Wiji tahe iwitxira aõmydỹñnana biwinyke: biwìhenanyke iixãwididỹñnadikemy. Tai tahe bedewona-di sõwetyhymy riatyõtyhy bedewona-ribi wahe.

<sup>8</sup> Tii luunatyhy-di bierynanybenyke.

<sup>9</sup> Tai heka adeereny õnosõna rewahinyre. Tai juhuu waritidỹña adeereny rewahinyre. Jiarỹ heka kaiboho rexiwinymy aõbo atxitenyteri ityhydỹña-ò. Kiamy adireny watxireri.

<sup>10</sup> Kai biixãwididỹnykeki heka, jiarỹ tule ariixãwididỹnyke. Kia adeereny rikiwinyrenyke Kristu òraru-ki.

<sup>11</sup> Tahe Satanasi tiu iny riatyrenyõtyhy. Inyboho rieryrenyre tii kia riwinykemy riwisỹnymyhỹré.

<sup>12</sup> Jiarỹ heka ròirenyre Troaji-ò Rybewihikỹ tỹnydỹmy Kristuni-di. Tamy rethemynyreu, isiraõlemy tai Rybewihikỹ dohodỹmy, Inynyry riwawìhenanyre wahe.

13 Tahe wabedewomy watxiwãhã inyseriòreneny Txitu-ki rahaõrekí. Tai tahe kia iny mahãdu reteòwarinyre arakremy Macedonia hãwã-ò rare.

14 Tahe Deuxu deysana! Deuxu-wana watxiwãhãrenenyre. Tahe kia ijesu tai ritake. Kristu heka ridykre ijesu tarasadu mahãdu. Rokoirenykre heka ihe-ki.

15 Iwese aderòna lÿnyrehekÿ ibutumy idi riàlànymyhÿre wese heka, kia wese inyboho roire. Ibutumy iny rierykemy heka ityhydÿÿdu mahãdu rÿirerimy ihÿre. Lÿnyrena wihikÿ Kristu ritoonyre wese Deuxu-ò inyboho roire. Iny lÿnyrena wese heka rare. Ityhydÿÿdu, ityhydÿÿdukõdu mahãdu-ò ramyhÿre.

16 Kia rityhynyõmyhÿre mahãdu tahe, tÿnyre rirubunyre. Rityhynymyhÿre mahãdu tahe tÿnyre iruweselemy rare. Kia aõmysÿdÿÿna biwinybenyke. Isirare heka iaõmysÿdÿÿ.

17 Inyboho heka sõwemy inywese aõkõ iny roire. Iwese iny riwymyhÿre aõòwyriòre idi ijohomy, kia wese karybe rare. Kia Deuxu deòdu mahãdu heka iòwydimy aõkõ rybe riwymyhÿre. Tahe inyboho heka inatyhymy rarybemyhÿrenenyre. Deuxu dori inydeereny rarybere òbitinamy. Riwateònyrenenyre òbitina-di araryberenykemy.

### 3

1 Timyre heka tyyriti ritididÿÿnamy raruõhymahãrenenyre jiarÿboho awirenyremy. Tahe waribireny tule aribireny kia Ritidÿÿna arihurenÿòtyhy.

2 Kaiboho heka Kristu tyyriti wese aõma toite. Riritinomy heka roimyhÿre inywo-ki, inyrayky-ki.

Idi riramy kaiboho burubenykeki, aõbo kaiboho tewinymahãte heka tamy betehebentyke. Tai tahe rierymy idi rariake ixideele. Idi rariake hãre tahe idi rexibedeerynyke.

<sup>3</sup> Kaiboho heka Kristu tyyriti wese heka toite. Inydeereny iwahidỹỹmy heka tii rare. Kia tyyriti wixiramy rare. Aõ ritidỹỹna manamy aõkõ riwinyreri. Deuxu Tyytybytyhy-di tahe riwinyreri. Aõ manatyre-ki aõkõ ròritidỹỹreri inyraykyreny-ki, inyworeny-ki ròritidỹỹmyhỹre.

<sup>4</sup> Deuxu heka retyhynymahãre, Kristu òraru-ki wahe. Tai tahe tuu raryberenymahãre kiawesemy.

<sup>5</sup> Jiarỹboho heka warururenyõhyyre kaa aõmysỹdỹỹna widỹỹna-ò. Iny ruruna heka Deuxu-ribi sohojile nade. Tii iny wiõhedỹỹdu, aõ iny rikiwinymyhỹrenyke-ò wahe.

<sup>6-8</sup> Irybe tỹmyra dohodỹỹdumy heka inyboho roire. Ihetxiu bede ywina wesemy aõko heka ròritidỹỹre Deuxu Tyytybytyhy ihỹre. Ihetxiu bede ywina heka rubu diwyde. Deuxu Tyytybytyhy iruna riwahinyre. Ihetxiu heka manatyre-ki ròritidỹỹre. Deuxu loosõna tule ròhõnyre, riwahinyreu wahe. Moisesi òsỹny-ribi sõwemy loosõna ròhõnyre. Idi tahe riixãwididỹỹnyre. Tahe judeu mahãdu reteheõhyymyhỹre iòsỹny-ò, iòsỹny loosõnadireki. Deuxu Tyytybytyhy heka iratyre awimy rare, iny-ò dori Deuxu irutyhy riwahinyre. Tahe bede ywina nade loosõna wiwihikỹ-di bede ywina tỹmyra tahe iratyre awi rare.

<sup>9</sup> Tii heka iny-di ixãwikemy ratxireri.

<sup>10</sup> Tahe iratyre rybe tỹmyra rare. Iny òraruna-di ixãwikemy ratxireri.

<sup>11</sup> Kia urihimyò rỹire awi rare. Iratyre tahe umytuedeõna rare.

<sup>12</sup> Iny raròsòna sòwemy ratximyhỹrenyre. Tai tahe inyboho ruberuõhyymyhỹrenyre.

<sup>13</sup> Moisesi wesemy aõkõ rakatximyhỹrenyke. Imahãdu raykytxymy dori rỹirenyre.

<sup>14-15</sup> Imahãdutxymy dori rỹirenyre. Moisesi bedeywina-di rariakeki, irayky ritòbònyke. Kia rieryõrenyre iraykyreny ratxynymyhỹrenyremy.

<sup>16</sup> Kristu rityhynyre xiery, irayky raraymyhỹre. Iwese Moisesi òsỹnytòbòna iòsỹny-ribi resere wese kia rare.

<sup>17</sup> Kia Tyyriti-ki Inynyrỹreny heka Deuxu Tyytybytyhy rare. Tikibo Deuxu Tyytybytyhy rỹikeki kowa ibutumy iny ixinamy rỹike.

<sup>18</sup> Tahe ibutumy inyboho heka Deuxu wowydyna iny òsỹnyreny-ki ijõdire. Iwese iny òsỹnyreny itxena-ki iny retehemyhỹ wese, Deuxu wowydyna ibutumy robimyhỹke iny òsỹnyreny-ki. Inynyrỹ he Deuxu Tyytybytyhy rare. Iribi tahe wowydyna nade. Kia wese inyboho heka Inynyrỹ wesemy relemyhỹrenyre. Inihikỹmy delemyhỹdenyde. Tii dori iny worenny-ki raaõòtaòtamyhỹre.

## 4

<sup>1</sup> Deuxu taruxetòena-di heka kia aõmysỹdỹỹna inydeereny diwahinyde. Tai heka ikonanakõdumy idi rakatximyhỹrenyke.

<sup>2-3</sup> Ibutumy heka rikiwinymyhỹrenyke aõbo òbiti rare. Aõbina binahakỹ widỹỹ-ò heka rekexiijerenyke aõbo òbitirele heka rikiwinyrenyke; rikiwiurònyrenyõtyhy heka Deuxu rarybereriki, tuu. Deuxuruòhyyle

rikiwinyrenyke. Inatyhyna loosòna-ki heka rakatxirenyke. Ibutumy heka rikiwinyrenyke ibutu itxerena òbitimy wahe. Inyboho ritỹnynymyhỹre Rybe tymyra wihikỹ. Inyõ-ribi riwòmymy roimyhỹkeki tahe kia rityhynyõmyhỹrele tuu ritidimy roike.

<sup>4</sup> Kiakeki tahe Satanasi iitxeredỹỹ-ò riijõnyreri loosònamy robike lau. Deuxu binadỹỹna rare. Ibinadỹỹdu wesemy ratxireri. Kaa loosòna-ò iny ritxeredỹỹnyhyymyhỹre aõma Rybewihikỹ tỹmyra-ò. Rarybemyhỹre dori Kristu heka Deuxu yrubule rare.

<sup>5</sup> Iximy aõkõ rarybemahãrenyke. Inynyrỹ Jesuisi Kristulemy heka rarybemahãrenyke. Inyboho heka deòdumy inyboho ratximyhỹrenyke adeereny. Jesuisi òraru-ki kia rewinymahãrenyke.

<sup>6</sup> Juhuu Deuxu rarybere: —Bedeluru-ribi heka loosòna doosòmymhỹde. Tii heka loosòna-di inyraykyreny ritoosònanymyhỹre. Tai heka iny Deuxu erysydỹỹna inyboho rieryrenyke. Kristu òsỹny-ki sohojile tuu rokobirenyke.

<sup>7</sup> Kia heka aõna aõna wiwi inydeereny heka rare. Ihyna òwy riòre wesemy inyummyreny ratxireri, butxi weselemy wahe. Tai heka Deuxu sohojile irurudire, inyboho aõko irurudire.

<sup>8</sup> Ihãrele heka aõbo iny riwinyke rieryõhyymyhỹre timybo aõ iny riwinyke heka.

<sup>9</sup> Aõhõkỹmy dỹỹnana heka inydeereny rehemynymyhỹre tai inyboho ikyhynamy riemyhỹrenyke. Inyboho heka bedewodihyy ratximyhỹrenyke, tahe tiemy iny raròsònarenydihyy inyboho ratximyhỹrenyke.

<sup>10</sup> Inyboho heka itxi tõhõti reahyy inyboho ratx-



imyhỹrenyre, Jesuisi rubuna-txi wahe. Kaki tahe iwese Jesuisi raremyhỹ wese heka rakatxirenyke. Tai iny witzira heka tuu robikre kiamy, Jesuisi rirudỹỹnanamy.

<sup>11</sup> Jesuisi òraru-ki heka brebunahakỹ-ki inyboho roire. Kia wese-ki heka iny Jesuisi runamy robikre inykireny.

<sup>12</sup> Kia-ki heka iny rubukonanareny inykireny rare. Tahe iruna akireny tule ratximyhỹre.

<sup>13</sup> Kiamy heka Ritidỹỹna roire: –Jiarỹ retyhynyre. Taita rarybere: –Kia weselemy roire. Retyhynyrenyneri tai heka jiarỹboho tule raryberenyneri.

<sup>14</sup> Jesuisi ixixadỹỹdu heka rare. Kaa tule inyboho tule riixixanyrenykre. Rikirònykre heka Deuxuko-txi. Kaiboho tule boibenyke wawanareny.

<sup>15</sup> Jiarỹ wawanareny kia adeeremy relere. Tamy Deuxu ruxetòena sōwetyhymy ramyhỹre-wana heka riwahinymyhỹre iratyre sōwetyhymy tamy deàlàna riwahinymyhỹre. Kia heka Deuxu wowydyna-ò tuu ratximyhỹre. Bedewoõmy.

<sup>16</sup> Iny bedewonaõhyyre heka. Iny umyreny retybynyre. Txuõ txuõlemy heka ratỹmyranyke inywo-ki. Tiie heka aõbo rierynyre inatyhyy wahe.

<sup>17</sup> Iny bededỹỹnanareny heka urihimyòle roimyhỹre. Iny wowydynarenyko-ki heka aõhõkỹmy dỹỹnana inyboho ritarenyke inydireny retehemyhỹre. Retyhenyrenyre wowydyna-ò awityhyremy inyboho idi retehemyhỹre iny idi retehõmyhỹredi.

<sup>18</sup> Aõbo iny tuu robimyhỹre bede bedemy tuu iny robimyhỹre ibutumy idi reamy. Aõbo iny tuu ro-

biõmyhỹre heka tiu itueõtyhy. Kia-di tahe inyboho rõhõtinyinmyhỹre.

## 5

<sup>1-2</sup> Inyummy tỹmyrahakỹ heka inydeereny kidiwahinykre Deuxu, iwitxira biu bedeki wahe. Aõ hãbu wahisidỹỹna-ki aõkõ Deuxu-di wahisidỹỹna-ki heka tuukre kia umy tỹmyra wahe. Tiu heka itueõtyhy. Rakabedeworenykre heka bedeki iny telesõreny-ki rasỹnyreki inywo-ki wahe.

<sup>3</sup> Inyboho heka biubede-ki inysỹreny inyummytỹmyra-ki rõkõhõtinyinmyhỹrenyke. Kaa iny umyreny wahe. Rabedewomyhỹreny. Umy tỹmyraõ heka rikitarenykemy inyboho ratximyhỹreny.

<sup>4</sup> Aõherekibo inyboho wiji rabedeworenyre? Inyboho heka Deuxu bedewihikỹ-ò arõirenykekõ aõbo? Inyreny rikitarenykemy aõkõ wiji. Kaki aõhõkỹmy dỹỹnana riwawobededỹỹnyra. Kia aõbo umy tỹmyra tyre tahe rikirutyrenyke ijõ wahe. Ijõ rikitarenykre umytuedeõnaõ. Tiu itueõtyhy. Kia riwinyre inydeereny kia wahe.

<sup>5</sup> Deuxu dori tuu rarybereri inydee riwahinykremy. Tatytybytyhy dori diwahinyde diteõsinyde.

<sup>6</sup> Kia iwese juhoo rarybere wese heka tuu rotỹỹnykre. Tai heka inyboho teysamy ratximyhỹreny. Kabede-ki inyboho ratximyhỹre heka inyummyreny ratximyhỹre heka aõ Inynyrỹ-wana aõkõ ratximyhỹre.

<sup>7</sup> Tiu heka rokobirenyõtyhy rikityhynyrenykeke-ile ka idi rakatxirenykre. Inyboho rieryreny

timybo rarekre wahe.

<sup>8</sup> Jiarỹ wadee awire kabede-ribi arexitake Deuxu-wana arasỹnyke wahe.

<sup>9</sup> Aõma tamydeewimy heka tuu iny riwinyke wahe iny-wana rasỹnyke. Kaki iny ratximyhỹre tahe aõbo awire heka tamy awire.

<sup>10</sup> Inydireny retehemyhỹre. Aõbo inyboho riwinyhỹrenyre. Aõbina bina rikiwinyrenyke heka aõhõkỹmy dỹñnana inydeereny riwahinykre. Aõwihikỹ riki rikiwinyrenyke wana tasỹ. Aõbo awityhy inydereny kidiwahinykre.

<sup>11</sup> Inynyrỹ heka inyboho rityhynymyhỹre. Tai inyboho iny witxira-ò tuu sõwemy relymyhỹrenyre. Ibutumy heka Deuxu iny rierymyhỹrenyre. Kaiboho heka tule tiwaerymahãtenyte.

<sup>12</sup> Kia heka reraòmy watximyhỹrenyre biwaerybenyke. Ararybeõtyhy heka adeereny jiarỹ awiremy. Tahe wadee ka awire kaiboho waluurenyke. Hãbu iumyle awimy rỹirerimy ihỹremy idi rõhõtinyinmyhỹre. Tii heka òbiti aõkõ rare. Kia biwyònybenykemy adireny watxireri.

<sup>13</sup> Juhuu iny rieryremy itelesõ. Inymyreny rarybekeki itxỹtemy inyboho roiremy. Rakaryberenyke heka aõbo inyboho dori Deuxu dee. Aõmysỹdỹñrenymyhỹreki inydireny rõhõtinyinmyhỹre. Inymyreny rarybekeki inyboho awilerenyremy. Iòrarureny-ki tuu rakatxirenyke.

<sup>14</sup> Kristu luuna heka kiamy iny rirayky-dỹñnymyhỹre. Tii heka rurure iny ibutudee. Tii rurureu, ibutumy inyderòwyrenymy rurure.

<sup>15</sup> Rurure heka aõma iny ixidee sohojile irumy

rareke lau. Kia tako-ò rakreu tamy heka irumy rakre. Tamy dori rurure tai rexixare rubu-ribi.

<sup>16</sup> Rakaraykynyrenyke timybo hãbu awiré, ibinaré. Kaimy heka rakaraykynyrenyke. Aõ iwese iny wixira raraykynymyhÿre wese aõkõ raraykynyrenyke. Aõma inyboho aõbo Jesuisi Kristu-di raraykynymyhÿre heka. Ixityre aõbo tuukre.

<sup>17</sup> Tii heka umy tÿmyra tuedeõna-di ratximyhÿre iwixira ratximyhÿre. Juhu iaõmydÿÿnana iribi ixãwira. Tahe wiji raraykywydynanyre iwixiramy. Ibutumy iaõna aõna ihetxiu heka rawixiranyre, awi-ò.

<sup>18</sup> Deuxu heka ibutumy kia riwinyre tamy. Inyboho heka iòludu roire, juhuru wahe. Wiji tahe ilinamy ijoi ratximyhÿre. Iny wixira heka ilinamy rarekemy idi watxiwãhãre.

<sup>19</sup> Wiji tahe timybo Kristu rarybekremy heka adeereny rarybereri. Aõma Deuxu kia liinamy rarekemy wahe. Ixinamy Deuxu. Ka Deuxu aõ anaumy wixiranydenyke. Kia Kristu òraru-ki tuu ratximyhÿre.

<sup>20</sup> Jiarÿboho Deuxu deòdu roire. Tai Kristu deròwimy adeereny rarybereri: Iluuna ixidee ixiby bimybenyke. Wii biwowixinybenyke.

<sup>21</sup> Deuxu heka iny òraruna ritidire Kristu tyre-ò. Kristu inyòrarunareny riwyre. Wiji tahe Deuxu òbitina inydeereny riwahinymyhÿre.

## 6

<sup>1</sup> Jiarÿboho tahe raaõmysÿdÿÿnyrenyke Deuxu dee. Deuxu ruxetòena dori tetatenyke, tai idi mohõtinybenyke, õhõtireny-ribi losaõmykemy.

<sup>2</sup> Boholabenyke aõmybo Deuxu rarybereriò. Jiarỹ heka aluurenyre iurenana tahe ka arybe-ò raholareri. Arawiòhenarenyre iu wadee textiòenyteu, wadee taryteu. Boholake wiji heka bitabenyke Deuxu ruxetòena. Wiji heka biu-ò hena txummy bede rỹire.

<sup>3</sup> Inyõ iny aõmysỹdỹñnarenymy ibinamy rary-bekeki, uritere ijõ iny bedeworenyõmy, jiarỹboho òraru-ki.

<sup>4-5</sup> Jiarỹboho dori Deuxu deòdutyhy roire. Tai rikiteòsinyrenyke ibutumy aõbo inyboho dori Deuxu deòdu roire. Tai riteòsinyke ibutumy aõbo iny riwinymyhỹke. Aõna aõna rikiteòsinyrenyke. Òhòte wakireny rỹimyhỹre. Ròtenawo-ò ralòmyhỹrenyre. Bedeweweky-ki aõhòkỹmy ratỹñnymyhỹre. Sõwemy heka reòludunyre aõnana bina binahakỹ reòludunyre. Aõ òta òta reòludunyre. Sõwemy heka raaõmysỹdỹñnynihikỹrenyre. Sõwemy heka aõmysỹdỹñnadikre; tỹikõ bede reijereny; byreõmy bede reijereny;

<sup>6</sup> òbitimy heka rewinyrenyre. Aõma, ywiny-di ròwidỹñrenyre bedeeryna-di. Ka roirewãhã iny iwitxira rewiòhenanyre. Ibutumy kia rewiòhenanymy roirewãhã. Deuxu Tyytybytyhy heka wawanahyy roiremyhỹ. Luuna heka inydee reteòsinyrenyre Inatyhyna rybe heka retỹnynymahãrenyre. Sõwe heka ritỹnynymy, jiarỹboho Deuxu deòdu roire wahe.

<sup>7</sup> Òbitina dori wadebònareny wese rare Satanasi itxemy. Jiarỹboho heka remymahãrenyre ar-itarenkyemy. Tule iny rexiijemyhỹre òbitina-di.

<sup>8</sup> Ijõ heka waluurenyre inyõ tasỹ aõbina bina-

hakỹle wadee riwinymyhỹre. Ijõ heka Rybewi-hikỹmy wadee raryberemyhỹre. Ijõ tasỹ rybe binamy wamyre, raujõmo. Inatyhyna rarybemyhỹre. Tai wamy ruidu riwaninimyhỹrenyre.

<sup>9</sup> Ibutumy heka iny riwayreny. Tahe rieryõhyymy heka inatyhy rare. Watxiwãhãrenyre rubu wese ihãre tahe warumy watxiwãhãrenyre. Tiiboho heka rubu wesemy inydireny ratximyhỹrenyre. Aõhõkỹmy ratỹỹnyrenyre hãre raruõhyylemy watximyhỹrenyre.

<sup>10</sup> Aõna aõna heka bedewonihikỹmy ròhõnyre. Tiiemy wadeysahyy watxiwãhãrenyre. Jiarỹboho heka urimynodule watxiwãhãrenyre. Ibutumy inyboho rityhydỹỹnyrenyre. Aõhomy aõkõ inyboho ratximyhyreny tahe ibutumy inydire roimyhỹrenyre.

<sup>11-12</sup> Tahe kaiboho ityhydỹỹdu seriõre mahãdu Oritxi hãwã-ki. Jiarỹboho heka kaa õbiti-my aõna aõnamy rarybemyhỹre. Kaiboho heka ijohona de-rarenyre aõmybo rarybemyhỹrenyreò. Jiarỹboho heka aluurenyre.

<sup>13</sup> Kai wariõre wesemy adee rarybereri. Umy iwese jiarỹ aluure wese, kai waluurenyre.

<sup>14</sup> Boholabenyke warybereny-ò ityhydỹỹdukõdu mahãdu-wana aõmysỹdỹỹrenyõke. Timybo õbitinaõ heka aõbinaõ-wana raaõmysỹdỹỹke. Timybo heka loosõna bedeluru-wana ratxike? Aõkõre! Tiu wi-wana rauriõtyhy.

<sup>15</sup> Satanasi heka Kristu-wana raaõmysỹdỹỹnanyõtyhy. Itydyỹdu mahãdu wi-wesehyyle raraykynykemy rỹira. Ityhydỹỹdukõdu mahãdu-wana tahe wiraykyweseke aõkõre.

16 Deuxu aõmysỹdỹña heka iwitxi rare, suritxoo aõmydỹñana-ribi, wahe. Kaiboho heka Deuxu dohodỹña ijoimy toite Deuxu oworeny-ki ratximyhỹre. Deuxule heka kawesemy rarybere: –Jiarỹ heka wasỹ ariwinykre ayreny-ki. Jiarỹ iDeuxumy aronykre tiiboho waijoimy. Rorokurenykre. Tai tahe Inynyrỹ rarybere wiribi bihitxinyke. Inybina-ribi bexihitxinybenyke.

17 Bexiebennyke òbitikõre-ribi wahe. Uritere tamy adi rexihumy, ixieryta aramyrenykre ix-idee wariòre wese.

18 Warurutyhymy adee rarybere. Boomy heka adireny ararekre, jiarỹle wahe. Deuxu rurutere rare Jiarỹ.

## 7

1-2 Deuxu ibutumy tuu rarybere: –Kai ityhydỹdu waseriòre mahãdu. Tai tahe rikexiòbitinyke ibutu aõmydỹñana-ribi. Iny umyreny-ki rokobirenyke inyumyrenyy-ki. Òbitimy heka rakatxirenyke iko-ò, Deuxuko-ò. Aõma waluumy heka atximahãbenykemy rahõtinywãhãrenyere. Iny-ò aõ bina bina rewinyõhywãhãrenyere.

3 Tuhe kaa rarybere tahe ixityre anarybekre. Aluurenyre jiarỹboho ibutuhyye ratximyhỹre iny rummy ratximyhỹre hãre tasỹ rukururenykre tulekre.

4 Wadee heka awire ibutumy kaiboho ratximyhỹrenyere. Kai aõwitxira witxira wadeereny rỹira umy retyhynyreki. Isirare heka wadee kia ratximyhỹhãrele WadeSATYHymy heka watxiwãhãre, wiòhedỹtyhy òraru-ki, ijyy òraru-ki.

<sup>5</sup> Jiarỹboho rethemynyrene Macedonia bede. Taita tule elehynaõhyyre wadereny. Ibutumy heka aõna aõna, òta òta wixira wixira; bede bede ihyymy aõkõre rỹire tai. Aõma bedewonihikỹ heka watelesõreny-ò ralore.

<sup>6-7</sup> Deuxu riwawiòhenanyrenyrene; Txitu diteònyde wadeereny. Tii rybereny heka awiremy kaiboõho. Tai tahe reysarenyrene jiarỹboho. Kaiboõho tabedewomy atxitenyteri waòraru-ki. Katahe wadeysa nihikỹmy watxireri.

<sup>8</sup> Adeereny warybetyyriti rewahinyreki tabedewomy atxitenyete. Tai tahe reysamy watxireri. Ihãrele heka tyyriti adeereny arawahinykre. Kaiboõho heka tabedewotenyete iribi tahe aõmydỹõna kaiboõho tewixiranytenyete teòbitinytenyete ibutumy.

<sup>9</sup> Tai tahe jiarỹ reysamy watxireri. Aõbinare dori rewinykõre arawiòhenanyrenyrene heka.

<sup>10-11</sup> Deuxu heka iny ribedeòtiidỹõnymyhỹre iny ywimy riraykydỹõnykemy. Kia kidiwymyhỹke inydee tarasana wahe. Tii heka awire. Ijõ bededeòtiidỹõ tahe bede ludu bede òtiidỹõ. Kia tahe rubu diwymyhỹde. Kaiboõho heka tabedeòtiidỹõnymyhỹtenyete. Deuxu heka kia riwinyrene awiòhedỹõnamy aõma kaiboõho awirenyrene. Aõ wixira wixira sõwemy akireny rỹireri, aõ òta òtareny. Kiadile tahe aõma òbitihyymy òhò ayreny-ribi kaiboõho heka taykarananytenyete. Kaiboõho heka waluudumy teletenyete. Kaiboõho biwinybenykemy aõbo òbitimy ratximyhỹre iwidỹõmy tarotenyete. Ibutumy heka òbitihyymy rarekemy idi tetehetenyete.

<sup>12</sup> Tai kia tyyriti adeereny rewahinyrene. Aõ



kia rewinyre heka aõ iny iòrarudikekile aõkõre rewinyre. Idi aretehekemy heka. Kaiboho walu-urenytyhyre aõbo òraru-ki wahe.

<sup>13</sup> Tai heka wadeysamy watxiwãhãre. Aõ iny-boho sohojile aõkõre teysa ratximyhÿrenyre. Txitu tule teysamy ihÿmyhÿre, kaiboho tawiòhenanyteki

<sup>14</sup> Tu heka rarybere adeereny kaiboho dori awimy tai tahatenyta awityhy. Adeereny heka inatyhyhy rarybemahãrenyre, inatyhynamy. Tule mobo rarybere Txitxu-ò. Ka tahe inatyhy rarybemy ratximyhÿre.

<sup>15</sup> Tai heka Txitu kia luuna heka aõnityhymy akireny rare. Itxi heka tõhõti akireny aõma Deuxu tetyhynmahãte-txi. Kaiboho tedytenyteki. Ihãrele urihimyò ruberumy ratximyhÿ.

<sup>16</sup> Reerymahãre jiarÿ kaiboho òbitimy boibekre. Tai wadeysamy watxireri.

## 8

<sup>1</sup> Deuxu ruxetòena-ki heka sõwemy riwinyre Macedonia dohodÿÿna mahãduy-ki wahe. Jiarÿ tuu arelyykemy idi watxireri waseriòreboho.

<sup>2</sup> Sõwemy heka iaõna aõnareny iaõòtaòtarenyre tiiboho. Aõhõkÿmy rotÿÿnyreri tiiboho. Ihãrele ka deysamy heka relerenyre. Reysareny heka. Tiiboho heka iaõkõrenyre. Aõhohomy aõkõ heka roiremyhÿ. Kiahãrele heka sõwemy riwahinyre tamahãdu wiòhedÿÿmy.

<sup>3-5</sup> Riwahinyre heka sõwemy ixideewimy. Sõwemy riwahinykelemy wadee rarybere. Tiiboho heka sõwemy wiòhedÿÿmy rurumy roiremyhÿ. Tai inyboho ribedeòtiinyre sõwereki. Kia judea bede, dohodÿÿna mahãdu, kia

wiòhedỹỹmy. Juhu heka tiiboho rexiwahinyrenyre Inynyrỹreny-ò. Tule Deuxu deewina inydee riwahinyre. Iny wiòhedỹỹnarenymy rexiwahinyre.

<sup>6</sup> Tai tahe jiarỹ rarybereri Txitu-ò: —Kai bi-wiòhenanykemy iaõmydỹỹnareny-ò.

<sup>7</sup> Kaiboho heka sõwemy tetyhynyteri. Kaiboho heka Deuxumy awimy tarybemyhỹtenyte. Kaiboho heka teerytenyte Deuxu aõmydỹỹnana. Kiaboho heka waluureny waluuurenymy boibeke wawiòhedỹỹdureny. Biwawiòhenanybenyke. Tai heka sõwemy bexiòlòdỹỹnybenyke adireny watxireri.

<sup>8</sup> Aõ bede ywinaõ heka adeereny rewahinyõhyreri. Arierykemy heka idi watxireri timybo aluuna ratximyhỹremy. Tii riteòsiny heka timybo ijõ dowiòhedỹỹmyhỹdemy. Tai tahe iwese tii rotỹỹnyre wese kaiboho tule botỹỹnykre.

<sup>9</sup> Deuxu ruxetòena teerytenyte, Jesuisi Kristu ruxetòena wahe. Tii heka ityhy rare. Tii rikõdỹỹnyre heka aòrarureny-ki.

<sup>10</sup> Taihyky tetyhynytenyte Deuxu aõmydỹỹnana-di. Kiamy heka raraykynyrreri. Arawiòhenanykemy heka adireny rahõtinyre kanau bedeu. Tewiòhenanytenyte inatyhymy. Tai tahe biconananybenyke kia kanau bedeu tewinytenyte heka biconananybenyke.

<sup>11</sup> Aõma ireiõno, uriõno biwahinybenykeki, Deuxu heka rimyke. Kia-di rõhõtinyke.

<sup>12</sup> Kia uriõnomy idi teywinymy atxiteri-di rõhõtinyke. Tamy wahidỹỹmy aõkõhyykeki tahe Deuxu aõma raraykynyõtyhy.

<sup>13-14</sup> Jiarỹ heka isiramy adee ariwinyõtyhy aõ. Kaiboho heka sõwemy kaa wiji toite, Tai

tawowi-di inyõ ròðkeki, taaõnasõwe myna Deuxu-ò riwahinykre. Iaõkõkeki tai ibinamy Deuxu rahaõtyhy. Tai biwiòhenanybenyke heka ihoõmy rýira mahãdu. Jiarý heka aõ retòenyneri aõkõ rare, biwahinybenykemy. Kai ihoõmy atxikeki tahe, tule inywitzira anawiòhenanykre. Taita wiwanale wiwesehyyle ròhònykre.

15 Kiamy heka Tyyriti-ki Ritidýýna roire: — Hãbuõ heka sõwemy ributunyre. Tahe aõhe rauhenyõhyyre tamy kia ibutuna-ribi wahe. Ijõ tahe ibutelemy ributunyre hãbuõ wahe. Tiile heka aõ tamy rasiranyõhyyre.

16 Txitu awiòhedýýrenymy rurumyhýre iwese awiòhedýýrenymy rurumyhãre wesele wahe. Deuxumy reaàre tai, Deuxu dori tuu rotýýnyre.

17 Taita ixinamy arorarenymy rehemynykremy.

18 Riwiòhenanyrenyneri iwitzira seriðreõ. Ibutumy dohodýýna mahãdu-ribi tii rityhynymyhýre aõma Rybewihiký-di ritýnynymyhýre awimy.

19 Dohodýýna mahãdu rihitxinyre wawana kanakemy. Ibutumy Inynyrý loosõna heka tuu ratximyhýre. Tule riteòsinymyhýre ibutumy iny rikiwiòhenanymyhýrenykemy. Tai heka inyseriðereny reteònyrenyneri ityhydýýdu mahãdu.

20 Tai inyõ kia nierumy inyõ rarybeõtyhy.

21 Òbityhylemy rikiwinyrenyke ibuturu-ò.

22 Ijõ tii-wana rake. Reurihirenyre heka tii wiòhedýýmy rakeò, tai heka tii wiòhedýýmy ratxireri.

23 Txitu heka waliina rare; wawana raaõmysýdýýnymyhýre heka rare. Jiarýboho heka awiòhedýýrenymy rarumahãrenyre. Ijõ

seriòrerenyõ nade dohodỹỹna-ò wiòhedỹỹmy. Tai kaiboho wowodyna tamy biwahinybenyke.

<sup>24</sup>Tai tahe dohodỹỹna mahãdu kaki rierykre. Tai rityhynyrenykre aõmybo umyreny rarybere. Tule wiluummy atxiteri.

## 9

<sup>1</sup> Reerywãhãre jiarỹ wiòhedỹỹmy tarumahãtenyete Judeia bede-ki. Tahe kiamy aõ aõkõ ariritinykre.

<sup>2</sup> Reerywãhãre timybo akireny rare. Jiarỹboho heka awimy raryberenyre umyreny Macedonia hãwã mahãdu-ò. Myheka rarybere: –Akaia bede seriòre mahãdu wiòhedỹỹmy rexiywinymy ratximahãrenyre kau beòrau. Tai tiiboho rexideysananyrenyre.

<sup>3</sup> Tai heka kaa seriòre mahãdu reteònyreri. Tai heka awikre biwiòhenanybenykre dori. Kiamy iwese rarybereri heka inatyhy rare.

<sup>4</sup> Araixỹrukre heka jiarỹ aõma bexiywinybenyõlemy wiòhedỹỹna-ò atxibenykre-wana. Tule kaiboho maixỹrubenyke.

<sup>5</sup> Tai heka inyseriòrereny reteònyre akorenymy. Tahe iu arehemynykreu, bexiywinybenyke. Biwahinybenyke wiòhedỹỹmy atxitenyteri ixideewimy. Aõ jiarỹ adeereny rexitòenyneri aõkõ wiòhedỹỹmy.

<sup>6</sup> Kia hãbu ibutemy ròbòròmhyhỹre heka ibutelemy tamy aõna aõna ruhunykre. Kia hãbu sõwemy ribrònymyhyhỹre tahe tamy sỹ sõwemy aõna aõna ruhunymyhyhỹre tamy riwahinykre bederaty aõmydỹỹnana.

7 Tai heka iny sohoji sohoji ixideewimy tiwesebo riwahinymyhỹke. Riwahinyõke tahe aõ tuu rurukõreri urenana tuu ratxike. Deuxu dee riwahinymyhỹke mahãdu deysana-di riwahinymyhỹre kia iny mahãdu Deuxu tuure.

8 Deuxu heka riwahinymyhỹre sõwemy aõmybo tarumahãte kia inydeereny iratyre. Ibutumy aõmybo tarumahãte heka tule iny witxira bi-wiõhenanybenyke.

9 Kiamy Ritidỹỹna-ki roire: –Tii tawowi-di iaõkõ mahãdu-ò. Rõwahimyhỹre. Kia tahe iinydee wobrona tiiemy rosaõmy rarekre. Deuxu heka riwahinymyhỹre tibo alòbòròdu-ò.

10 Inydee riwahinymyhỹre paõ iny rirỹsỹke. Tahe tule sohoji sohoji òwòrutymy rurumyhỹre heka tamy riwahinymyhỹre. Kia ribòrònymyhỹre tahe Deuxule ritxuhudỹỹmyhỹre. Tahe sõwemy bitakre Deuxu-ribi.

11 Kia rimymyhỹre mahãdu tahe Deuxumy reàlãmehỹre. Kia tewinymahãte heka Deuxudeewimy tewiõhenanymahãte. Deuxu heka sõwemy rimymyhỹre eàlànareny iòraru-ki.

12 Kaiboho heka Deuxu mahãdu teri-wiõhenanytenyete. Kia sohojile aõkõ. Tule aòraru-ki tiiboho Deuxu-ò wowydyna sõwemy riwahinyrenyke.

13 Kaiboho Rybewihikỹ tỹmyra tetyhynyteny-teri, Kia ibutumy rierymyhỹre kaiboho dori uriõno tewiõhenanytenyete, tai iny wowydyna Deuxu-ò riwahinykre.

14 Adee rexitòenykre aluumy heka relekre Deuxu adee ruxetòena riwahinyreki.

15 Deuxu-ò wowydyna iny-ribi kanakemy heka

idi watzireri. Wahidỹỹna wihikỹ dori Deuxu iny-deereny riwawahinyre.

## 10

<sup>1</sup> Jiarỹ Paulo heka aõmybo adeereny arexitòenykre. Aõherekibo tamy tarabemahãtenyte awanareny watxiwãhãu urihimiyòle watyhyna watzirerimy wamy tarybemahãtenyte. Jiarỹ heka awana rybetere-di rarybeõmahãre awanareny watzireri wana. Tiu rareu, taheka ròritidỹỹre rybetere-di wahe.

<sup>2</sup> Rõhõtinywãhãre. Rexitòenyre. Awi heka rare. Ywina-di iny risỹnymyhỹre. Inyõ wamyreny ibinamy rarybekeki tahe tule ararybeke heka.

<sup>3</sup> Inatyhymy kabede-ki inyboho rasỹnymyhỹrenyre. Rakaaõbinanykeki, inyumyreny aõbinana wesemy rare. Tebònadirenyre.

<sup>4</sup> Tebònadirenyre. Aõ kabledemy iny rỹira kia debòna wese aõkõ kỹny. Deuxu debòna heka rỹira irurule heka rare.

<sup>5</sup> Inyõ aõbinamy Deuxumy rarybemyhỹkeki, tai tahe kia wadebònareny remymy resewãhãrenyre kia ixãwididỹỹnamy wahe. Ibutumy Deuxu òludumy ratximyhỹre heka remywãhãrenyre Deuxu rierykemy Kristu rityhynkemy wahe. Kaiboho heka ibutumy tetyhynmahãtenyte.

<sup>6</sup> Kaiboho biatybenykeki, tahe, rexihuhyymy rỹimyhỹre aõhõkỹmy dỹỹnana-ò.

<sup>7</sup> Kaiboho heka tetehemahãtenyte aõna aõna-ò ahana-ribi wesele wahe. Inyõraraykynykeki ratximyhỹreny ixinamy tuu raraykynye. Jiarỹboho heka tule Kristu mahãdu hõrõ iny ratxirenyre.

8-9 Deuxu heka ruruõ wadee diwahinyde arawiõhenanykemy tai raixruõmyhÿre. Tai heka abrebudÿÿrenymy aõbo kariti rewinyre. Urile tahe aumydÿÿreny adireny rewisÿnywãhãre aõ bede arãatyremy aõkõ.

10-11 Ityyriti rybetere heka ribrebudÿÿ tahe rehemynyreu heka tii aõkõ rybetere-di rarybemyhÿre. Awityhymy aõkõ rarybemyhÿre rir-itinyreu. Iwese ròritidÿÿre wesemy aõkõ rarybere. Iu adehemynykreu tahe, iwese ròritidÿÿre wesele heka anarybekre.

12 Iny tai ratximyhÿre heka sõwemy ixidi rõhõtinyinmyhÿre tii awiremy. Kia tahe watximyhÿreny kia raryberenyõtyhy. Tii dori raitxÿtemy ratximyhÿ.

13 Aõmy iximy rarybemyhÿre dori tii awimy iximy rarybemyhÿre heka urile tuu raraykynymyhÿ. Timybo Deuxu inydee raryberele rikiraõmyhÿke. Kiawesele inydeereny awire.

14 Iaõmysÿdÿÿna heka timybo rikiwinyrenykele iny riijemyhÿreny. Juhu heka Rybe tÿmyra wihikÿ heka adeereny adiwykemy idi watxiwãhãre. Rewyreny heka juhoo Rybe tÿmyra wihikÿ adeereny rewyre. Tai heka tuu raryberenyõhyymahãreny timybo iny witxira aõmysÿdÿÿna riwinymyhÿreny.

15 Kaiboho heka aityhydÿÿnareny raumynykre. Tii heka wadeereny awire. Jiarÿboho heka aõmysÿdÿÿna wihikÿ sõwemy ariwinyrenykeny watxirenryeri ayreny-ki, Deuxudeewireki.

16 Idi tahe aròirenykre rybe-di ar-itÿnynyrenykeny ijõbede-ò, Rybe tÿmyra wihikÿ-di

wahe. Aõmy ararybeõtyhy aaõmysÿdÿÿnareny iwitxira rewinyremy. Kiamy heka Ritidÿÿna-ki roire:

<sup>17</sup> –Urile tuu rybe rÿike Inynyrÿ timybo riwinyrelemy.

<sup>18</sup> Iny ixidi rõhõtinyinmyhÿre tii awireny. Tahe awi aõkõ rare Deuxu-ò. Deuxu tahe awimy tai rahamyhÿre tii idile rõhõtinyinmyhÿreki.

## 11

<sup>1</sup> Jiarÿ òsana urihimyò raitxÿtemahãremy kaiboho wawana tõiterimy ixi-di atxitenyteri. Ihãrele taheka urihimyò reòludunymahãre. Jiarÿ heka okorenre iwese Deuxu ratximyhÿre wesele.

<sup>2</sup> Ywimy atximahãbeny adireny watxireri. Kaiboho iwese ijadõma hãbumy roikre wese toite. Hãbu heka Kristu rare.

<sup>3</sup> Jiarÿboho raberuwãhãrenre kaiboho Kristu-wana atximahãbenyke lau wahe. Iwese Eva hemylala riitxenanyre wese wahe.

<sup>4</sup> Inyõ kanakeki rõhãletedÿÿmy Jesuisi witxiramy. Tahe kaiboho bityhynybenykekile jiarÿ heka raberumahãre.

<sup>5</sup> Ijõ dori ritÿnynymyhÿre iwese inyboho ritÿnynymyhÿrenre wese aõkõ iwitxiramy.

<sup>6</sup> Kaiboho heka tahõtinyinmahãtenyete tÿnydÿÿdu wihikÿmy inykireny ratximyhÿre. Tahe awireny idi tahõtinyinmahãtenyete. Tai iwesele inyboho roire awi heka roire.

<sup>7</sup> Tahe iwese tii awityhymy rarybemyhÿre wese aõkõ inyboho rarybemyhÿrenre. Tahe iny rierymyhÿrenre inyraykyreny-ki. Sõwemy heka tuu adeereny rarybemahãrenre. Iu jiarÿ



rybe ritỹnynomy akireny rarewāhāu, kiau heka adeereny rexitōenyōhyyre iòwydỹỹmy. Iyjamy heka ixidee reijenynrenyre kaiboho hexiòlònybenykemy. Teòsare òsana iwese rewinyre wese.

<sup>8</sup> Ijō dohodỹỹna mahāduō heka riwaòwynyrene adeereny aritỹnynrenykemy. Iwese iribi rawasinyre wesemy heka rahōtinyre.

<sup>9</sup> Iu akireny rybe-di tỹnydỹỹmy rarewāhāu tiu rexitōenyōhyyre adeereny biwawiòhenanykemy. Macedonia hāwā-ribi dori ityhydỹỹdu, mahādu seriòreō aōmybo raruwāhāre wadee diwyde. Tiu heka aō aribireny aritaōtyhy. Tuu rarehy wese heka wiji rarekre.

<sup>10</sup> Kristu inatyhynamy wadee rarybereri kia wese tule ararybekre ibutumy Akaia hāwā hāwā-ki.

<sup>11</sup> Jiarỹ heka aluunihikỹrenyre. Taile heka tuu rarybewāhāre Deuxule rieryre.

<sup>12</sup> Kia rybe tỹnydỹỹdu heka iwese rewinywāhārenyre wesele ròwidỹỹmyhỹre. Kia heka rewinywāhārenyre heka kia rarybereri heka aō wiribi lahitxi aōkōmy rarybereri.

<sup>13</sup> Kahābu heka inatyhy Deuxu deòdỹỹna aōkō ratximyhỹre. Ruile heka iaōmysỹdỹỹna-ki ròhònymyhỹre. Rexitỹnynykemy Kristu deòdỹỹna mahādu-ò.

<sup>14</sup> Tahe aōkōre heka Satanasi tule rexiwitxi-ranymyhỹre. Ýju wesemy tii rexideòsinymyhỹre. Kia hābu teòdu rare. Tai heka irehemy iribi rexi-ijaranyre òbiti deòdu mahādu ratxireriki wahe.

<sup>15</sup> Urile tuu iny idi rōhōtinykelemy heka tuu ratxirerimy ihỹre. Tahe aōkōre. Ikonanau tahe aōhōkỹmy dỹỹnana ritarenykre aōbo

riwinymyhÿre òraru-ki.

<sup>16</sup> Ixityre tuu ararybekre. Inyõ raykykõmy jiarÿ itxÿte raremy. Ararybekre heka waaõmydÿÿnanarenemy.

<sup>17</sup> Teramy ijirarenyõmyke aõmybo ararybekre. Deuxu dori tuu arybedÿÿ-ò riwaijõnomy, tai heka rarybere itxÿte wesele watximahãremy.

<sup>18</sup> Kaiboho heka taholamahãtenyete itxÿte mahãdu-ò. Katahe bodoholabedenykre aõmybo ararybekre.

<sup>19</sup> Inyõ kedehemynykeki kaa biwinybenykre. Tahe tewinymahãtenyete aõna aõnamy aõkõ wahe.

<sup>20</sup> Inyõ araitxenanyrenykeki uritere aõmydÿÿrenyõmy tamy. Jiarÿ heka ariwinyõtyhy tuu, wadee awiõre.

<sup>21</sup> Ijõ rarybemyhÿre inyõ. Tule jiarÿ ararybekre. Itxÿte wesemy ratximyhÿremy.

<sup>22</sup> Tii heka Hebreu mahãdumy tii rexininire. Jiarÿ tule kia tuu rare. Ijaò mahãdumy heka tii-boho rexininirenyre. Jiarÿ tule. Abraõ riokoremy rarybemyhÿre. Jiarÿ tuleri.

<sup>23</sup> Kristu deòdumy heka tii rexininimyhÿre. Rarybemahãre itxÿte wesemy. Jiarÿ heka iratyre deòduwimy watxiwãhãre. Jiarÿ raaõmysÿdÿÿ nihikÿre. Ròtenawo-ò riwarutyrenyete iratyre. Riwhatenyrenyete iratyre. Arurure inihe iratyre.

<sup>24</sup> Judeu mahãdu heka 39 hetenamy wamy raòhòtere iruyre sõwemy wahe.

<sup>25</sup> Roma mahãdu tasÿ inataõmy riwhatenyete. Sohoji ta mana-di watyre rihure. IjõtXu heka hãwoninihikÿ heka riorore. AõutXu heka bera-ki rãire ruu ibutumy txuu tule ibutumy rehure.

26 Ibutumy reamy rarewãhã aõma wasidu bede aõmydỹnanamy bera-ki tule arurure inihe. Judeu mahãdu warubudỹmy wadi riwisỹnyre. Tule judeukõdu mahãdu tulere. Hãwãhãkỹ-ki brebunatyhymy watxiwãhã, bede rahy-ki tule, ahohokỹ-ki tule. Waliinaõ inatyhy aõkõ tai ihỹmyhỹ. Tai heka riwaitxenanyrenyre.

27 Aõmysỹdỹ nihikỹ tai. Tỹikõhyky heka bede reijemy rarewãhã. Rama riwasare; bemy rarowãhãre. Timy heka tỹinatykyõ ihoõhykyre sõwemy wahe.

28 Tai tahe rahõtinyre ibutu dohodỹna mahãdu-di.

29 Urihimyòle taruru-di ratxireri wana jiarỹ tule iheki waruruhomy aõkõ relemahãre.

30 Inyõ raòrarunymyhỹre wana jiarỹ rabedewowãhãre iòraru-ki. Jiarỹ rexideòsinywãhãre waaõkõre urityhywãhãre.

31 Deuxu Jesuisi Kristu tyby dori riwaerymyhỹre aõu aõu heka iny rakanihikỹnykre.

32 Iu Damasu hãwã-ki rarewãhãu, Iòlò Areta bede dinodu heka riwamymy riwateònyre. riwamykemy hãwãhakỹry ijò-ò.

33 Weriri nihikỹwomy riwawòmý riwatidire, Walina mahãdu. Tahe heto raro-ribi riwaatyre hãwã ahana-ò. Tai tahe rahenyre iribi.

## 12

1 Jiarỹ heka ararybekemy watxireri. Aõ aõkõ rarehãrele heka ararybekemy watxireri. Wiòhedỹna aõkõ heka rare. Wanyrỹ wadee riwahinyre aõna aõnamy heka rabire rasina wese jiarỹ sohojile wahe. Kiamy heka arelyykre wiji.

2-3 Tahe 14 beòramy heka Deuxu ityhydỹduõ ridyre biu-ò tasỹ-ò wahe. Deuxule rierymyhỹre inatyhy aõbo rare ada aõkõre aõbo.

<sup>4</sup> Kahãbu Deuxu-ribi heka rybeõkemy roholare. Tahe rarybeõtyhy.

<sup>5</sup> Iximy tahe ararybeõkre kia wadeysarehãre. Waaõhõkỹmy dỹỹnanadile areysakre.

<sup>6</sup> Urile ararybekre timybo releremy. Taile tahe iny tuu rarybekre. Tuheka rabire sõwemy aõwiwihikỹmy. Jiarỹ awiremy iny wamy raraykynyheny.

<sup>7</sup> Tahe Satanasi aõbinana wixirahakỹbo wadee riwahinyre. Ixidi arõhõtinyõkre. Jiarỹ aõwiwihikỹ jiarỹ raremy wahe. Araraykynyõkemy.

<sup>8</sup> Inataõmy heka Inynyrỹ-ò rexitõenyre kiamy waribi ritakemy.

<sup>9</sup> Tii wadee rarybere: –Waruxetõenale heka adee awire. Aõbo kai taaõkõteu heka waruru adee rewahinyre. –Tai tahe jiarỹ reysare, waaõkõreu wahe.

<sup>10</sup> Tahe awire, waõkõna, warurukõna, ibutumy wadee awire. Kristu òraru-ki heka tuure. Tiubo ibinamy wamy riwinykreu warurukõkreu, warurudikre.

<sup>11</sup> Rarybere heka hãbu itxỹte wesele heka rarybereri. Kaiboho iõrarureny-ki heka kia wesemy rarybereri. Inatyhymy heka jiarỹ kia rybe tỹnydỹỹdu mahãdu bina ratyre watxiwãhãre. Ayreny-ki rarewãhãu heka teerytenyete.

<sup>12</sup> Aõna aõna wiwihikỹ, deytana wihikỹ, bedeõtiidỹỹna ayreny-ki rewinyre kia Kristu deòdumy watximyhỹreki wahe.

<sup>13</sup> Rybe tỹnydỹỹ òwyõ heka aribireny retaõhyyre.

14 Ihewoludu txu tahe aroramy arakemy ix-idi watxireri. Inataõmy reywinyra aroramy arakremy wahe. Aribi nieruõ aritaõtyhy. Urile arawiõhenanyrenykremy adireny watxireri. Uladu riki heka tyby riyrubunyõtyhy. Tyby tahe uladu riyrubunymyhÿre.

15 Ibutumy idi watxireri heka arahukre arawiõhenanyrenykremy. Adeereny wylemy arihukre. Jiarÿ heka aluurenyre. Kaiboho aõbo tule waluurenykre?

16 Waðraru-ki heka adee isiraõkre heka. Ihãrele tahe inybina wamy rarybemyhÿre: –Tii itxenadÿÿdu rare.

17 Wamahãdu tule aribireny ritaõtyhy ijõ.

18 Txitu reteõnyraijõ ityhydÿÿdu seriõreõ-wana. Tii aõbo aõ aribireny ritare? Aõkõre. Txitu wawesele heka tii rare.

19 Taõmysÿdÿÿna heka awiõhedÿÿnarenymy rare. Aõ wadi jiarÿ awiremy nohõtirenyõmy tuheka rarybereri adeereny. Deuxu, Kristudeewinamy heka tuu adeereny rarybereri heka. Deuxu kotxi heka adeereny rarybereri awiõhedÿÿrenymy.

20 Raberumahãre heka arehemynykreu, iwitxiramy atxibenybeke lau. Tule wadi iwitxiramy betehebenyke xiweserenymy aõkõ. Ihãru, adebure. Aõkemy watxireri. Iny aõbina binamy wimy rarybemyhÿre. Iny ixidile rõhõtinyrerimy ihÿre mahãdu. Kia aroholakeki tahe wadee awiõre. Riyrubunymyhÿre. Riyrubunyõhyymyhÿre.

21 Raberuwãhãre heka arahinykre heka akotxireny iõhãru òraru-ki. Aõna aõna witxira witxira òta òtamy rõhõtinyryhÿre, raraykynymyhÿre. Sõwemy heka riwinyre ta

ixi-txi tōhōti reaōhyymyh̃re kia riwinyretxi.

## 13

<sup>1</sup> Tahe ikonana txu roraludu heka jiar̃ rare. Inyō aōbina binamy wimy rarybemyh̃reki waribi ihitxihitximy heka tuu rarybemyh̃re. Iny rimymyh̃re heka tuu robimyh̃re; tuu rarybemyh̃re. Wiweselemy heka tuu rarybekre.

<sup>2</sup> Iny iòrarudimy r̃yikre-wana, ibutumy heka aōhōk̃my rot̃ỹnykre arehemynykreu.

<sup>3</sup> Aōmy Kristu rybemy heka rarybekre. Tai bierybenykre. Aōmy warurud̃ỹdure heka bierybenykre Kristu wahe.

<sup>4</sup> Kristu heka itxeò-ki rurure irururenyō wahe. Jiar̃ warurunarenykō òraru-ki. Tahe Deuxu ratximyh̃re, iruruna-di. Tii-wana heka inyboho heka ratximyh̃renyire iruruōmy. Tai awanarenyle watzireri, tahe tii-wana Deuxu ruruna-wana watzireri.

<sup>5</sup> Ixi-di heka betehibenyke. Bexiurihibenyke tyhyna-di atxitenyterimy. Jesuisi Kristu awo-ki ratxireri.

<sup>6</sup> Kia terytenytemy, inatyhy. Tahe jiar̃boho inatyhymy aōna aōna riijerenyre. Kia aōbo teerytenyte.

<sup>7</sup> Jiar̃boho rexitòenyrenywāhārenyire. Òraruna wid̃ỹrenyōmykemy. Kaiboho aōwiwi biwinybenyke. Kia òbitimy watzimyh̃renyireki aōkō, kiemy òbitimy boibenykemy.

<sup>8</sup> Aōbo heka inatyhyna wiòhed̃ỹnale rikiwinyrenyke.

<sup>9</sup> Kaiboho arurudimy atxitenyteri-wana heka, jiar̃boho warurudimy watziwāhārenyire, kia

wadeereny awi rare. Rexitòenmahäreny  
kaiboho òbitimy matxibenybekemy, ywimy  
ahābenykemy.

<sup>10</sup> Tai heka adeereny ratyyritinyreri kiamy.  
Aribireny irehemy watxiwāhāre taheka  
arawiòhenanyrenyke. Arehemynykreu tahe  
timy heka aōhōkỹmydỹnanamy arōhōtinyōtyhy,  
kia waaōmysỹdỹna rare. Inynyrỹ dori iny  
wiòhedỹnarenymy nade. Iny aōhōkỹmy dỹnanamy  
aōkō.

<sup>11</sup> Arakre tahe waseriòreboho. Idi bi-  
wisỹnybenyke ibutumy òbitimy biwinybenykemy.  
Warybe-ò heka boholabenyke. Wiwese weselemy  
maraykywydynanybenyke wiribihiximy aōkō.  
Ywina-di matximahābenyke. Deuxuluuna heka  
tule akireny ratxikre.

<sup>12</sup> Wii birybenymyhỹbenyke ityhydỹdu seriòre  
mahāduō tai wiluomy atximahābenyke.

<sup>13</sup> Ibutumy Deuxu ijoi mahādu heka adee rybe  
riwehityhynanyreri.

<sup>14</sup> Jesuisi Kristu Inynyrỹ ruxetòena heka  
akirenykemy watxireri. Deuxu luuna aki rỹikre.  
Deuxu Tyytybytyhy awana rỹikre.

## **Deuxu Rybe Tyyriti** **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Karajá

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.



2014-04-27

---

PDF generated using Haiola and XeLaTeX on 18 Apr 2025 from source files  
dated 29 Jan 2022

55ce0bcd-101e-52a3-984e-847027efe150